

„Mayday-Mayday“

Hier is Covid-19, ik bruk Hölp! So oder een beten anners kunn dat to Tied mennigmaal to hör'n ween. Uns Eer geiht dat opstünns gorni goot, de steiht Kopp un hett Fever. Is ja ok keen Wunner, överall in uns Medien hört een wat vun so'n „CORONA-Virus“ vör den een nich wegloopen kann. Dat Virus schall een so richtig tosetten, een „Männergrippe“ is dorgegen man blots een beten Snöven. Wenn dat Virus di richtig tofaten hett, denn geiht een dat richtig slecht, dorvun kann een sogar dood blieven. Wodennig kümmt düet Coronavirus überhaupt her? Toerst hebbt de Chinesen in de Stadt Wuhan dormit tosetten un vun dor hett sik dat Virus as so'n Epidemie över dat ganze Land verdeelt. Dörch den globaliseerten Massentourismus hett sik dat nu op de heele Eer verdeelt un hett sik to'n Pandemie entwickelt. Överall hebbt se eer Grenzen dicht maakt, de Minschen dörpt ni mehr reisen, sodennig stahn se all' ünner Quarantäne. Grote Veranstaltungen ward all afseggt, överall find blots noch Geisterveranstaltungen statt, de Wirtschaft hett dorünner to liden un de Banken un Börsen sünd an't kollabieren. Nix geiht mehr un domit sik nümms ansteeken deit is Zwangsurlaub anseggt, Kneipen, Schoolen un Kinnergaarn ward dichtmaakt.

Veele Lüüd kamen nu düchtig in't sweeten, sünd an't simmoleeren un weten nich so recht wat se maken schüllt. Dat giff aver ok Minschen de ward kopplos, de dreih'n denn so richtig aff, de ward richtig hysterisch. In de Suppermärkte hamstern de Lüüd, all'ns wat se kriegen können, so as Nudeln, Toilettenpapeer un Desinfektionsmiddel. Un wenn dat in de Kophüüs nix mehr geven deit, denn klauen se dat in de öffentlichen Toiletten. De sünd raffgierig un ramschen all'ns tosamen wat se kriegen können, as wenn dat nasten Dag nix mehr geven deit.

Man maakt sik ja doch so sien' Gedanken, is dat villicht so'n Aart biologische Kriegsführung, will man so uns Wirtschaft in de Knee zwingen? Wenn man dat global bekieken deit, denn hebbt se letztenends doch all' dorünner to liden. Villicht kamen de lüttjen Viren ja ok ut dat Weltall, oder außerirdische Wesen kamen mit eer Ufo's op uns Eer un verbreden hier Angst un Schrecken. Wi Minschen starven as de Fleegen un denn laaten se sick dat hier op uns Planet good gahn. Un wi ropen un funk denn SOS-save our souls - „rettet unsere Seelen!“

Ik wünsch jüm gesundheitlich all'ns Gode un seh'n se to, dat dat Virus an eer Huusdöör vörbi geiht. Jümmers schön de Klinken putzen, de Hannen waschen un all'ns schön mit so'n Desinfektionsmiddel insprütten - wenn dat denn noch wat to köpen giff! Fragen se sünst maal eern Naver, de hett ja villicht wat hamstert.

Mit pandemischen Grötens - eer Schriever *Reimer Reese*